

周氏醫學啟書

蘇氏醫學啟書

內經評文

光緒戊戌皖南
建德周氏藏板

內經評文自序

素問靈樞醫之祖也卽文之祖也其義理法度傳於
邃古非秦漢諸子之所能臆度也其精神格力比於
六經非秦漢諸子之所能攀擬也且夫藏府脈絡陰
陽運氣曲折微渺至難摩繪而兩經英詞風發浩然
沛然析及毫芒昭於日月是神於醫而雄於文者秦
漢之際未聞其人況秦漢文多奇崛是書寬平正大
不動聲色而天地萬物已在涵蓋之中糟粕精華盡
入微言之內故常以爲此三代之盛涵養有道之士
之所爲作也古者醫術以口相授每厯一師必加潤

色謂是增潤於三代之後可也謂非出於三代之前不可也雖然世之詆其僞者多矣辯之卽累千百言亦終不能祛其惑而又何所輕重於聖經獨其文之可法可師稍知慕古者莫不知好向來選家遺而不錄何哉徒以隸於方伎而薄之又其語皆實事非如空談名理者之易爲講說也夫孰知其內益於身心性命外裨於文章功力有勝於泛讀空文萬萬者乎學海不揣固陋輒仿茅鹿門儲同人評左氏傳戰國策文例取兩經之文爲之分析腠理指點起伏使覽者見其脈絡貫通義理昭著抑揚頓挫情韻流連足

以發人之神智而舞蹈於不自覺也倘亦昌明聖經
之一術歟是書也得其精微可以入聖而廣其功用
亦以濟人和陰陽拯天札儒者之責也而又不背於
文事儒者不能讀此更責誰讀之而乃競名利從嗜
慾大道之要漠不關及坐使古法失傳蕩然無存迄
今之日天下不乏有志之士而窮於無所受每覽斯
文未嘗不撫膺悼痛也光緒二十二年歲次丙申新
春人日皖南建德周學海徵之氏書於蠓廬

黃帝內經素問原序

臣聞安不忘危存不忘亡者往聖之先務求民之瘼恤民之隱者上主之深仁在昔黃帝之御極也以理身緒餘治天下坐於明堂之上臨觀八極考建五常以謂人之生也負陰而抱陽食味而被色外有寒暑之相盪內有喜怒之交侵天昏札瘥國家代有將欲斂時五福以敷錫厥庶民乃與岐伯上窮天紀下極地理遠取諸物近取諸身更相問難垂法以福萬世於是雷公之倫授業傳之而內經作矣歷代寶之未有失墜蒼周之興秦和述六氣之論具明於左史厥

後越人得其一二演而述難經西漢倉公傳其舊學
東漢仲景譔其遺論晉皇甫謐刺而爲甲乙及隋楊
上善纂而爲太素時則有全元起者始爲之訓解闕
第七一通迄唐寶應中太僕王冰篤好之得先師所
藏之卷大爲次注猶是三皇遺文爛然可觀惜乎唐
令列之醫學付之執技之流而薦紳先生罕言之去
聖已遠其術晦昧是以文注紛錯義理混淆殊不知
三墳之餘帝王之高致聖賢之能事唐堯之授四時
虞舜之齊七政神禹修六府以興帝功文王推六子
以敘卦氣伊尹調五味以致君箕子陳五行以佐世

其致一也奈何以至精至微之道傳之以至下至淺之人其不廢絕爲已幸矣頃在嘉祐中仁宗念聖祖之遺事將墜于地迺詔通知其學者俾之是正臣等承乏典校伏念旬歲遂乃搜訪中外裒集眾本寢尋其義正其訛舛十得其三四餘不能具竊謂未足以稱明詔副聖意而又採漢唐書錄古醫經之存於世者得數十家敘而考正焉貫穿錯綜磅礴會通或端本以尋支或泝流而討源定其可知次以舊目正繆誤者六千餘字增注義者二千餘條一言去取必有稽考舛文疑義於是詳明以之治身可以消患於未

內經言
兆施於有政可以廣生於無窮恭惟皇帝撫大同之
運擁無疆之休述先志以奉成興微學而永正則和
氣可召災害不生陶一世之民同躋于壽域矣國子
博士臣高保衡光祿卿直秘閣臣林億等謹上

黃帝內經素問原序

啟玄子王冰撰

夫釋縛脫艱全真導氣拯黎元於仁壽濟羸劣以獲安者非三聖道則不能致之矣孔安國序尚書曰伏羲神農黃帝之書謂之三墳言大道也班固漢書藝文志曰黃帝內經十八卷素問卽其經之九卷也兼靈樞九卷迺其數焉雖復年移代革而授學猶存懼非其人而時有所隱故第七一卷師氏藏之今之奉行惟八卷爾然而其文簡其意博其理奧其趣深天地之象分陰陽之候列變化之由表死生之兆彰不謀而遐邇自同勿約而幽明斯契稽其言有徵驗之

事不忒誠可謂至道之宗奉生之始矣假若天機迅發妙識玄通藏謀雖屬乎生知標格亦資於詁訓未嘗有行不由逕出不由戶者也然刻意研精探微索隱或識契真要則目牛無全故動則有成猶鬼神幽贊而命世奇傑時時間出焉則周有秦公漢有淳于公魏有張公華公皆得斯妙道者也咸日新其用大濟蒸人華葉遞榮聲實相副蓋教之著矣亦天之假也冰弱齡慕道夙好養生幸遇真經式爲龜鏡而世本紕繆篇目重疊前後不倫文義懸隔施行不易披會亦難歲月旣淹襲以成弊或一篇重出而別立二

名或兩論併吞而都爲一目或問答未已別樹篇題
或脫簡不書而云世闕重合經而冠鍼服併方宜而
爲歟篇隔虛實而爲逆從合經絡而爲論要節皮部
爲經絡退至教以先鍼諸如此流不可勝數且將升
岱嶽非逕奚爲欲詣扶桑無舟莫適乃精勤博訪而
并有其人厯十二年方臻理要詢謀得失深遂夙心
時於先生郭子齋堂受得先師張公秘本文字昭晰
義理環周一以參詳羣疑冰釋恐散於末學絕彼師
資因而謨注用傳不朽兼舊藏之卷合八十一篇二
十四卷勒成一部冀乎究尾明首尋注會經開發童

內經詩文 素問原月
蒙宣揚至理而已其中簡脫文斷義不相接者搜求
經論所有遷移以補其處篇目墜缺指事不明者量
其意趣加字以昭其義篇論吞并義不相涉闕漏名
目者區分事類別目以冠篇首君臣請問禮儀乖失
者考校尊卑增益以光其意錯簡碎文前後重疊者
詳其指趣削去繁雜以存其要辭理秘密難粗論述
者別誤玄珠以陳其道凡所加字皆朱書其文使今
古必分字不雜糅庶厥昭彰聖旨敷暢玄言有如列
宿高懸奎張不亂深泉淨滢鱗介咸分君臣無天枉
之期夷夏有延齡之望俾工徒勿誤學者惟明至道

流行徽音累屬千載之後方知大聖之慈惠無窮時
大唐寶應元年歲次壬寅序

內經評文素問目錄

唐太僕令啟玄子王冰正次

宋光祿卿林億重校正

皖南建德周學海評注

第一卷

上古天真論一

四氣調神大論二

生氣通天論三

金匱真言論四

第二卷

陰陽應象大論五

陰陽雜合論六

陰陽別論七

第三卷

靈蘭秘典論八

六節藏象論九

五藏生成篇十

五藏別論十一

第四卷

異法方宜論十二

移精變氣論十三

湯液醪醴論十四

玉板論要篇十五

診要經終論十六

第五卷

脈要精微論十七

平人氣象論十八

第六卷

玉機真藏論十九

三部九候論二十